

Quid Vina commemorabo, optimi saporis odorisque? Passim quidem admodum generosa leguntur, aliis tamen & aliis locis præstantiora. Varii præterea generis videre hic est Animalia, magnamque Pecudum & Fera-
rum copiam, quibus recensendis omnibus ne tempus teram: scribit Cæsar multa in Silva Hercynia genera Fe- *Animalium va-*
rarum nasci, quæ reliquis in locis visa non sint: ex quibus quæ maxime, inquit, differant ab cæteris & memoria pro- *rietas.*
denda videantur, hæc sunt: Est bos Cervi figura, cujus a media fronte inter aures unum cornu existit excelsius, magisque
directum his quæ nobis nota sunt cornibus, ab ejus summo sicut plumæ ramique late diffunduntur; est fœmina marisque natu-
ra eadem forma, magnitudoque cornuum. Sunt item quæ appellantur Alces. Harum est consimilis Capris figura, & va-
rietas pellium, sed magnitudine paulo antecedunt, mutilæque sunt cornibus & crura sine nodis articulisque habent, neque
quietis causa procumbunt, neque si quo afflictæ casu conciderunt, erigere sese aut sublevare possunt. His sunt arbores pro cubili-
bus, ad eas se applicant, atque ita paululum modo reclinata quietem capiunt: quarum ex vestigiis, quum est animadversum a
venatoribus, quo se recipere consueverint, omnes eo loco aut a radicibus subruunt, aut abscindunt arbores tantum ut summa
species earum stantium relinquatur: huc cum se consuetudine reclinaverint, infirmas arbores pondere affligunt, aut una ipse
concidunt. Tertium est genus eorum qui Uri appellantur; ii sunt magnitudine paulo infra Elephantos: specie & colore &
figura Tauri. Magna vis est eorum, & magna velocitas: neque Homini neque Fera quam conspexerunt, parant: hos
studiose foveis captos interficiunt. Hæc ille. Ad Imperiū Majorū venio. SACRA ROMANI IMPERII SEDES, *Imperium majo-*
quæ in Occidentem Orientemque divisa variis multarum gentium excursionibus labefactata, dissidiis lacerata, *rum.*
mole sua ruinam minitabatur, relicta Italia, non alia potius regione, quam Germania, præsidium, robur, sa-
lutem quæsit, electo in Imperatorem Carolo Magno Francorum Rege, quem Ingelheimii (pagus est secundo
milliari a Moguntiac) natum ferunt, atque ibidem nobile exstruxisse Palatium, cujus rudera adhuc visenda
sunt. Mansit Imperium in stirpe Carolina annos centum, & quod excurrit: qua deficiente, translatum est
ad Conradum Franconiæ Ducem: quem Henricus Anceps sequutus est: hunc Ottones tres: quorum ultimus
quum intelligeret Romanos Crescentio Consule rursus adfectare Imperii titulum, coacto exercitu Romam
cepit, impetravitque a Gregorio Pontifice, ut jus eligendi Romanum Imperatorem perpetuo apud Germa-
nos permaneret. Impetravit autem hac lege, ut electus primum vocaretur Cæsar & Rex Romanorum:
postea vero accepta a Pontifice corona haberet titulum Imperatoris Augusti. Electores constituti sunt septem:
e quibus Archiepiscopi tres; Quatuor Principes quos vocant seculares: ab his post excessum Ottonis primus
lectus est in Imperatorem Henricus cognomento Sanctus. Eandem electionis formulam postea Imperator Ca-
rolus I V in Bullam auream, quæ hodie exstat, redegit. Insequentibus temporibus varia officia in Germania
constituta sunt, ad augendum Imperii decus, de quibus Mercator. Germanorum fortitudinem Tacitus qui
sub Vespasiano Præfes Belgarum fuit, brevi ornat elogio: Nemo bellum Germanis (inquit) intulit impune. Exper- *Majorum vir-*
ta id quondam tres sub Augusto Legiones superata. Experti Carbo, Calsius, Scavrus, Aurelius, Servilius m.
Capio,